

四庫全書

集部

欽定四庫全書

集部

宋詩紀事卷六十七

詳校官監察御史_臣李陽樾

侍讀_臣孫球覆勘

總校官進士_臣繆琪

校對官中書_臣牛稔文

謄錄監生_臣沈世攻

欽定四庫全書

宋詩紀事卷六十七

錢塘厲鶚撰

危昭德

昭德字子恭邵武軍人寶祐元年進士歷官起居舍人殿中侍御史權工部侍郎兼同修國史
寶錄院致仕有春山集

春晚

晴天楊柳絲千緒
淡月梨花玉一庭
又是東風去時節

數聲啼鳥不堪聽

後村千家詩

王翔龍

翔龍四明人寶祐元年進士

遊澤山

在慈谿

獨俯空堂夜無人境自寬高風河影動斜月竹身寒湖
海秋聲闊山林客夢安坐來更幾點北斗已闌干

延祐四明志

樂雷發

雷發字聲遠春陵人寶祐元年特科第一有雪

磯叢亭

寄姚雪篷使君

時姚貶衡州

湘鱗六六寄相思
疎柳新蟬想別時
今夜各聽三楚雁
秋風又老一年詩
梅花且補離騷闕
蕙苾應為史筆知
翦竹疑峯新製笛
待衝霜月訪桓伊

寄許介之

惹得詩名徧九州
酒徒棊伴半公侯
離騷甘隱魚鱗屋

樂府多傳鴟鵂樓醉葉幾窠藏菊徑蠹荷三畝護漁舟
中原應有樓蘭國空鎖吳鉤到白頭

送丁少卿自桂帥移鎮西蜀

瓊海收兵玉帳閒又移齋艦泝涪灣三邊形勢全憑蜀
四路封疆半是山魏將舊聞侵劔閣漢兵今欲卷函關

時會有三
京之役

細傾瑞露論西事想在元戎指顧間

舜祠送桂林友人

堯山分手舜山逢呼酒旗亭兩鬢蓬客思且須論契濶

詩交應不計窮通兒曹富貴秋烟外前輩風流落葉中
明日吟船又何處渡江衣冷荻花風

讀繫年錄紹興八年以後事

婁敬金繒滿去輒便看雷雨潤遐陬諸賢自抗排雲議
宰相方深偃月謀湘國乍聞悲鵬鳥秣陵還聽唱符鳩
九原晏老今知否搔首青編恨未休

秋日村路

兒童籬落帶斜陽豆莢薑芽社內香一路稻花誰是主

紅蜻蜒伴綠螳螂

題昭州田廷亮書臺後

少海無波鶴禁虛滿朝閉口養膏螭白袍烏帽和寧外

卻有山人請建儲

以上雪磯叢索

游紫霞洞歌

猗歟奇哉紫霞之洞真天開千變萬化不可述恍如幻
出方壺與蓬萊湘妃兩姝不敢到悵望蒼梧雲縹緲邇
來三千三百年班龍空卧金花草我採姹女江華濱是

為三十六帝之外臣右提綠玉杖左攜紫金經長歌天
上謠一呼開仙局列炬照深窈懸身事幽討羣仙喜我
來驚笑欲絕倒何侯撫我項偉遠拍我肩綠華贈我金
條脫安期分我虹景丹借問此何地指言太虛天翠霞
紫雲張寶幄懸藜結綠盤瓔珞萬疊蒼苔荒石田誰呼
青龍耕紫烟虎獄銅牆未徧識擬開寶藏紅雲笈嗟我
水際披蓑翁應是籤鏗釣神龍仙人仙人何多事驚眩
世俗變靈異或跣巨足垂天雲或叩短趾畱沙渚或見

姑射處子身粉霞紅綬藕絲帚或見普陀大士形或簪
楊柳垂寶瓔或插鏤象管或結火齊珍或琢縣圃玉或
布祇園金洞中之深不知幾百里但見縈紆曲折一里
一澗水人言有路通桂林乘興欲尋日華君吾聞洞中
大小洞天三十六帝遣列真分治局上界官司應更多
定知此地應誰屬猗歟奇哉紫霞之洞真天開我上會
稽探禹穴復浮滄海登天台巖谷豈無奇視此何塵埃
摩挲崖石題惡句記我杖屨敲雲來黃涪翁元漫叟目

力一生空宇宙澹巖陽華有何奇枉費詩篇刻石實

九疑

山志

嚴椿齡

乙卯禱雨梅壇

大隱清名格帝閭真人新寵祭王言南昌補吏官雖小
北極通班道更尊諫疏不容強漢室仙風聊復傲吳門
我來物色朝元處山遶星壇水遶村

梅仙事實

王洧

消號仙麓閩人曾為浙帥參

西湖十景

蘇隄春曉

孤山夜月趁疎鐘
畫舫參差柳岸風
鶯夢乍醒人未起

金鴉飛上五雲東

段橋殘雪

望湖亭外半青山
跨水修梁影亦寒
待伴痕邊分草色

鶴驚凍玉啄闌干

雷峯夕照

塔影初收日色昏
隔牆人語近甘園
南山遊徧分歸路
半入殘塘半暗門

麴院風荷

避暑人歸自冷泉
步頭雲錦晚涼天
愛渠香陣隨人遠
行過高橋方買船

平湖秋

萬頃寒光一席鋪
冰輪行處片雲無
鷺峯遙度西風冷

桂子紛紛點玉壺

柳浪聞鶯

如簧巧轉最高枝
苑樹青搖萬縷絲
玉輦不來春又老
聲聲訴與落花知

花港觀魚

斷汊惟餘舊姓傳
倚闌投餌說當年
沙鷗曾見人興廢
近日遊人又玉泉

南屏晚鐘

涑水崖碑半綠苔春遊誰向此山來晚烟深處蒲牢響
僧自城中應供回

三潭印月

塔邊分占宿湖船寶鑑開區水接天橫玉叫雲何處起
潭心驚覺老龍眠

兩峯插雲

浮屠對峙絕攀躋積翠浮空霽靄迷試向鳳凰山上望
南峯天近北峯低

以上咸淳臨安志

寶祐丙辰余奉漕檄經從得識九鎖山面目咸淳
乙丑歲除前五日以帥檄遵奉朝旨四縣踈決回
塗重游時積雪初霽瓊瑤境界恍非人世得七言
一章錄呈菊巖龔先生

九鎖山寒玉作圍紅塵世事可曾知峯迴似覺前無路
身到因思舊有詩雲掩巖扉龍蟄冷月明華表鶴歸遲
梅花笑我真迂闊踏雪重游臘盡時

洞霄詩集

文天祥

天祥字宋瑞一字履善吉安人寶祐四年進士
第一度宗朝累遷直學士院知贛州德祐初除
右丞相兼樞密使元兵至奉使軍前被拘亡入
真州泛海至温州益王立拜右丞相以都督出
江西兵敗被執囚於燕京四年不屈死柴市有
指南吟嘯等集

敬和道山堂度瞻御書韻

墨灑天奎映籀紅斯堂殿閣與俱隆方壺圓嶠神仙宅

溫洛縈河造化工列聖文章千載重諸孫聲氣一時同
著庭更有邦人筆稽首承休學二忠

著作之庭乃胡忠簡公書周文忠公

立

游青原

鐘魚閒日月竹樹老風烟一徑溪聲滿四山天影圓無
言都是趣有想便成緣夢破啼猿雨開元六百年

空庭橫蟠螭斷碣偃龍蛇活火參禪筍真泉透佛茶晚
鐘何處雨春水滿城花夜影燈前客江西七祖家

以上文山

集

南華山

北行近千里迴復迷西東行行望南華忽忽如夢中佛
化知幾塵患乃與吾同有形終歸滅不滅惟真空笑看
曹溪水門前坐春風

金陵驛

草舍離宮轉夕暉孤雲飄泊復何依山河風景元無異
城郭人民半已非滿地蘆花和我老舊家燕子傍誰飛

從今別卻江南日化作啼鵑帶血歸

以上指南錄

遇異人指示作五言八句

誰知真患難悟此大光明雲散天仍在風休水自清功名幾滅性忠孝太勞生此意如能會神仙亦可成

上元懷舊

禁門三五金吾夜回首青春忽二毛池上昔陪王母宴
斗中今直貴人牢風生江海龍游遠月滿關山鶴唳高
夢到鈞天燈火鬧依然彩筆照宮袍

以上吟嘯集

理宗度宗

在燕京獄中

先帝弓劍遠永懷侍芳茵今朝漢社稷為話涕霑巾

誤國權臣

似道喪邦之政不一而足其羈北使閉邊釁則兵連禍結之始也哀哉

蒼生倚大臣北風破南極開邊一何多至死難塞責

京城

當寧陷玉座兩宮棄紫微北城悲笳發失涕萬人揮

陵寢

五陵花滿眼霜露在草根冥冥子規叫重是古帝魂

以上

文山集社

邳州哭母小祥

九月七日

我有母聖善鸞飛星一周去年哭海上今年哭邳州遙
想仲季間木主布筵几我躬已不闕祀事付支子使我
早淪落如此終天何及今畢親喪于分亦已多母嘗教
我忠我不違母志及泉會相見鬼神共懽喜

過淮

北征垂半年依依只南土今辰渡淮河始覺非故宇故

鄉已無家三年一羈旅龍朔在何方乃我妻子所昔也
無奈何忽已置念慮今行日云近使我淚如雨我為網
常謀有身不得顧妻兮莫望夫子兮莫望父天長與地
久此恨極千古來生業緣在骨肉當如故

亂離歌六首

有妻有妻出糟糠自少結髮不下堂亂離中道逢虎狼
鳳飛翩翩失其凰將雛二三去何方何虞國破家又亡
不忍舍君羅襦裳天長地久遠茫茫牛女夜夜遙相望

嗚呼一歌兮歌正長悲風北來起彷徨

有妹有妹家流離良人去後攜諸兒北風吹沙塞草萋
窮猿慘淡將安歸去年哭母南海湄三男一女同歔歔
惟汝不在割我肌汝家零落母不知母知豈有瞑目時
嗚呼再歌兮歌孔悲鵲鷓在原我何為

有女有女婉清揚大者學帖臨鍾玉小者讀字聲琅琅
朔風吹衣白日黃一雙素壁委道旁雁兒雁兒秋無梁
隨母此去誰人將嗚呼三歌兮歌愈傷非為女兒淚淋

浪

有子有子風骨殊釋氏抱送徐卿雛四月八日摩尼珠
榴花犀錢落繡襦蘭湯百沸香似酥欸隨飛藿飄泥塗
汝兄十三騎鯨魚汝今三歲知在無嗚呼四歌兮歌以
吁燈前老影明月孤

有妾有妾今何如大者手將玉蟾蜍次者親抱汗血駒
晨妝靚服臨西湖英英雁蕩飄瑤琚風花亂墜鳥嗚呼
金鏡沆漑浮汙渠天摧地裂龍虎袒美人塵土何代無

嗚呼五歌兮歌鬱紆為爾迎風立斯須

我生我生何不辰孤根不識桃李春天寒日短空愁人
北風吹隨鐵馬塵初憐骨肉鍾竒禍如今骨肉更憐我
汝在空能嬰我懷我死誰當收我骸人生百年何醜好
黃梁得喪俱草草嗚呼六歌兮勿復道出門一笑天地

老

收柳女信痛割腸胃人誰無妻兒骨肉之情但今日事到這裏于義當死乃是命也奈何奈何塗中有三

詩今錄至言至于此淚下如雨一讀此三詩便知老兄悲痛真切之情事至于此為之奈何兄弟事祇待十二哥至造物自有安排一可將此詩呈嫂氏歸之天命仍語靚妝瑤英不曾周旋得毋怨毋怨徐妳以下皆可

道達吾此意當此天翻地亂人人流落天數奈何奈何
一可令柳女環女好做人爹爹管不得淚下哽咽哽
咽一此詩本仍可納之十二哥 兄天祥家書達百
五賢妹

鐵網珊瑚張翥跋云右文信公遺墨前參知政
事本齋王公所藏公歿已久家人理篋篋書尺
叢積顧是紙損爛將裂以拭卮匱公之子季境
適至識為信公書咄咄驚異亟命裝池以完嗚
呼豈非有神物守護之歟不然英靈之氣不泯
而致之歟先賢尺牘人尚皆藏弃之矧信公之
精忠偉烈震耀古今翰墨光芒垂示臣子者乎
不惟王氏寶之百世而下固夫人之所同寶也
史官河東張翥書

羅椅

倚字子遠號礪谷廬陵人饒雙峯高第寶祐四
年登第以秉義郎為江陵教改潭州及宰贛之
信豐遷提轄權貨度宗升遐失子入臨論罷

吳江雪霽圖

天上清流雪片人間名勝吳淞兩賢相厄已甚賴得斜

陽半峯

詩家鼎鑿

次劉孟元見贄韻

坐久不知夜飢語窺瓦檠詩徒吟樂國酒不打愁城白

雪夫君句黃花老我情商量能住否賸欲飲公榮

翰墨大全

寄危驪塘贈以古鑑

百尺樓頭山雨長夢提白髮濯滄浪從渠金帶花成簇
何處魚羹飯不香語妙囊中了今古騷成肘後繫瀟湘
山寒歲晚蘭苗盛欲當包茅獻草堂

詩林萬選

幼輿折齒歌

秋衫未成錦機語棠梨半花鳳一羽象牀雪綜小龍梭
細穴銀光口水縷西鄰郎君東海歸芙蓉半白杏雨肥

十二闌邊說幽怨勸織南浦鴛鴦飛匿蘭含蕙無消息
春醒彤霞漾玉色小龍呼出風雨聲奔騰觸裂雙白石
白石國城三十六女子軍來兩城覆鸞歌猿嘯強激昂
百戶風來如箭鏃章臺公子真豪縱復以微言相感動
郎君切莫更癡心忍作甘心可人痛

乾坤清氣

吳琳

琳字禹玉號存吾潛之子寶祐四年進士倅婺
州

題鹿田西寺壁

為從吏隱招提宿相望城中隔幾塵雲暗雨來疑是晚
山深寒在不知春鋤松得石添幽徑接竹通泉隔近鄰
此去又尋三洞約初平應怪我來頻

吳禮部詩話

唐天麟

天麟嘉興人寶祐四年進士

烟雨樓

百尺樓高足賞心我來猶記舊登臨四時天色有晴雨

一片湖光無古今
遠塔連陰知寺隱
小舟穿柳覺春深
凭闌多少斜陽景
分付漁歌替晚吟

至元嘉禾志

陳著

著字子微號本堂
鄞人寶祐四年進士
仕為著作郎
出知嘉興忤賈似道
改臨安通判
有本堂集

題勝國院

在奉化縣

轉路便幽深
曾來不用尋
寺依仙石脚
僧識老巖心
是

處鬼無墓此山松自林滔滔未涯事分付一蟬吟

延祐四明

志

陸夢發

夢發字太初歙人寶祐四年進士官太府寺丞
德祐乙亥歿于上海有烏衣集

梅花

城中忙失探梅期初見僧窗一兩枝猶喜相逢那恨晚
故應更好半開時今冬不雪何關事值伴孤芳卻欠伊

月落山空正幽獨，慰存無酒且新詩。

梅花鼓吹

薛嵎

嵎字仲止，一字賓日，永嘉人。寶祐四年進士，終

長溪簿。有《雲泉集》。

趙東閣曰：雲泉詩本用唐體，物與理稱，自成一派。

歲暮書懷

園林春又近，老態更無懽。
添歲兒童喜，照貧燈火寒。
直心嗟道喪，多事識才難。
已種梅千樹，從今爛漫看。

寄宋希仁兄弟

咫尺不相見，閉門唯苦吟。
聽殘寒夜雨，灰盡壯年心。
身外一貧在，燈前百慮深。
所欣交友義，白首到如今。

省試舟中

闕下春光近，囊金又一空。
霜風吹敗絮，星斗隔疎篷。
世道誰能挽，妻孥見未同。
青燈對黃冊，銷盡幾英雄。

漁村

生涯小小落溪灣，妻子知時不說難。
畢竟直鉤為計拙。

晚來無酒可銷寒

松風隆首座住雲際禪院

山門開望海鐘鼓動魚龍人具慈悲相秋生寂寞隨
身惟一鉢留偈別雙松後夜橋西月支筇失所從

自君之出矣

自君之出矣抱此離恨情春蠶不作絲纏綿過一生

以上

雲泉集

陸秀夫

秀夫字君實楚州鹽城人寶祐四年進士累擢
宗正少卿兼權起居舍人元兵入臨安益王立
于福州進端明殿學士同簽樞密院事崖山破
負王赴海死

鶴林寺

歲月未可盡朝昏屢不眠窗前多古木牀上半殘編
放犢飲溪水助僧耕種田寺門久斷掃分食媿農賢

鎮江府志

句

曾聞海上鐵斗膽猶見雲中金甲神

挽張郢州世傑
山房隨筆

謝枋得

枋得字君直號壘山信州弋陽人寶祐四年進士咸淳中為江東提刑江西招諭使景炎帝以枋得為江東制置使即弋陽起義兵軍潰隱于閩元徵聘累辭不就後福建行省魏天祐迫脅至燕不食死門人誄之曰文節先生有壘山集

北行別人

雪中松柏愈青青扶植綱常在此行天下豈無龔勝潔
人間何獨伯夷清義高便覺生堪捨禮重方知死甚輕
南八男兒終不屈皇天上帝眼分明

求紙衾

避世知無地危身只信天寧持龔夬

一作勝

扇不著挺之

綿養性真同道知心有宿緣紙衾加惠絮晴日卧雲邊

春日聞杜宇

杜鵑日日勸人歸一片歸心誰得知望帝有神如可問

謂子何日是歸期

慶全菴桃花

尋得桃源好避秦
桃紅又見一年春
春花飛莫遣隨流水

怕有漁郎來問津

以上疊山集

武夷山中

十年無夢得還家
獨立青峯野水涯
天地寂寥山雨歇

幾生修得到梅花

天地間集

菖蒲歌

有石竒峭天琢成有草天天冬夏青人言菖蒲非一種
上品九節通仙靈異根不帶塵埃氣孤操愛結泉石盟
明窗淨几有宿契花林草砌無交情夜深不嫌清露重
晨光疑有白雲生嫩如秦時童女登蓬瀛手攜綠玉杖
徐行瘦如天台山上聖賢僧休糧絕粒孤鶴形動如五
百義士從田橫英氣凜凜摩青冥清如三千弟子立孔
庭回琴點瑟天機鳴堂前不入紅粉意席上常聽詩書
聲怪石篠簜皆充貢此物舜廟當共登神農多智入本

草靈均蔽賢遺騷經幽人耽翫發仙興方士服餌延修
齡綵鸞紫鳳琪花苑青蚪玉麟芙蓉城上界真人好清
淨見此靈苗當大驚我欲攜之朝上帝太清瑤草不敢
專芳馨玉皇一笑留香案賜與有道者長生人間千花
萬草盡榮豔未必敢與此草爭高名

宋遺民集

柴隨亨

隨亨字剛中號瞻岵居士寶祐四年進士知建
昌軍事宋亡與其兄望弟元亨元彪隱于樾林

九磔之閒人稱柴氏四隱

題白雲菴

散策入禪扉愁城酒解圍
泥黃肥客屨雲淡護僧衣
心事溪相照吟情雨帶歸
未盟泉石隱林鶴背人飛

江行即事

讀罷騷經手自抄
紉蘭歸計勝誅茅
新蠶食葉將成繭
舊燕銜泥旋補巢
菜老花隨黃麥落
草長色與綠楊交
一春過盡三之二
閒倚東風憶孟郊

錢唐寒食

絮花如雪草如茵
寒食清明處處春
惆悵錢唐門外路
今年人哭去年人

以上柴氏四隱集

舒岳祥

岳祥字舜侯台州寧海人寶祐四年進士官奉
化尉終承直郎宋亡不仕有篆畦橐蜨軒橐竹
梧里橐蓀墅橐學者稱閭風先生

古意

客從南方來遺我薰風琴薰風未易致且奏易水吟高
浪忽起立四顧變愁陰征馬立躊躇旁人淚霑襟壯士
不畏死怒髮豎森森長揖辭四座秦關無阻深燕客視
秦王已若置中禽一朝事不成易水有悲音請君且勿
彈此曲傷人心

一春四十日天氣未佳花事行復已矣太息成吟
積翠林塘十畝陰雨中不覺晚寒侵江山萬里登樓眼
宇宙千年隱几心有客不來還日暮掩書無語自春深

倚闌欲數排簷竹故故飛花點客襟

以上赤城詩集

天門山

烟樹連天遠漁樵兩地分
仙舟滄海路僧錫石橋雲
落日人行少空村犬吠聞
誰知隱淪者絕迹在人羣

石臺紀遊

蒼山面長溪勢若飲奔馬
層臺跨其脊萬古絕蕭灑
登臨惟茲時朋從未云寡
迢迢歷榛莽靡靡眺原野
白雲與翠霞夏在履鳥下
窮秋向搖落霜菊摘盈把
賞心孰

與同幽抱欣已寫邈矣千載期名山俟來者

以上台州府志

楊白花

楊白花懊惱隨風渡江水將心莫託少年郎少年一行
輕萬里楊條插地便生根花性飄揚似夢塵恨不築城
高萬丈花飛莫放出重門珠簾繡柱香雲護祇有黃鶯

知去路

宋藝圃集

唐元齡

元齡新建人寶祐進士樂安令

鬱林寺

一徑通深窈叢林獨蔚然
仙棲佛屋香火當僧田
罕

見催租吏誰談文字禪
吳儂來拜朔樓指滿三千

西江詩話

潘希白

希白字懷古號漁莊永嘉人
寶祐中登第幹辦
臨安府節制司公事德祐中起為史館檢校不

赴

送蔣朴之維揚

隋家天子愛揚州四十離宮取次遊
荊棘久迷秦隴路柳絲空拂汴河流
君才清似庾開府世事難于孫仲謀
莫為青山怯騎馬卻將風景付閒愁

入南溪

沙頭落月照篷低杜宇誰家樹底啼
舟子不知人未起載將殘夢上南溪

以上東甌詩集

史季溫

季溫字子威眉山人舉進士寶祐中官祕書少

監

遊鼓山

上到瓊峯第幾間，御風騎氣渺人寰。
天高陟覺星辰近，地迴偏饒日月閒。
去海茫茫疑十里，望州隱隱見三山。
武夷榜墨千年在，任使重厓蘇字斑。

鼓山志

朱杰

杰字子俊，金華人，寶祐中豐城令。

遊九鎖山

九天虎豹不守關
瑤京夜半墮塵寰
化為青山故曲折
中有玉殿開仙班
白龍天來三百丈
飛沫直下琉璃灣
神仙可望不可接
桃花伴我歸人間

洞霄詩集

侯 畱

畱字道子樂清人以武舉仕寶祐間為海州通判李松壽據山東突出漣泗麈城下死之賜廟旌忠諡節毅有霜崖集

暮雨

暮雨生寒衣袂薄楚鄉客子正傷情扁舟莫向蘆邊宿
夜半西風有雁聲

東甌詩集

曾極

極字景建臨川布衣文定公弟宰之後以詩語
訛謗謫道州卒有春陵小雅金陵百詠

寄蔡西山時在道州貶所

四海朱夫子徵君獨典刑青雲伯夷傳白首太玄經有
客憐孤憤無人問獨醒瑤琴空鎖匣絃絕不堪聽

後村詩話

往春陵作

扶策行行訪楚囚也勝流落嶠南州鬢絲半是吳蠶吐
襟血全因蜀鳥流徑窄不妨隨薊粟路長那更聽鉤輅
家山千里雲千疊十口生離兩地愁

鶴林玉露渡江以來詩禍殆絕唯寶祐間中興
江湖集出劉潛夫詩云不是朱三能跋扈秋綠
鄭五欠經綸又云東風謬掌花權柄卻忌孤高
不主張教罷之云梧桐秋雨何王府楊柳春風
彼相橋曾景建云九十日春晴景少一千年事
亂時多當國者見而惡之並行貶斥景建謫春
陵死焉往春陵詩云云

送曾泉州

隱然風節動朝行，屢叩龍墀貢卓囊。
未促相如歸蜀道，翻令汲黯去淮陽。
使藩自足榮萊服，邃殿誰當補舜裳。
急召諸賢固根本，璽書早晚出明光。

濂洛風雅

和謝康樂華子岡韻

隱仙無定在館宇，非一山華子出商洛。
巢雲俯渴泉羸顛，劉蹶際師生自為賢。
頗哀區中人峯頂起新阡，決絕目下事。
駕鴻凌紫烟，身隱焉用文滅跡。托空筌雲仍散。

洲渚世漁業相傳
筇簪挂虎落舴艋當門前
蹇子厭世慮
企石聽潺湲
山空月明時
足音自玃然

遊華子岡紅泉碧澗

去城纔半驛
深谷自逶迤
藤絡崩崖石
松垂倒地枝
寒

山東毛髮碧澗照
須眉霜氣全消歇
空存太傅祠

以上撫州

府志

金陵百詠

存二十九首

覆舟山

在城北五里晉北郊壇宋藥園壘樂遊
花冰井甘露亭皆在此山

六代興亡貉一丘繁華夢逐水東流操蛇神

原注列子注山海之

神皆操蛇

向山前笑三百年前幾覆舟

秦淮

在縣南三里始皇時望氣者云金陵有天

子氣使朱衣鑿山為瀆以斷地脈改金陵

為秣陵晉陽秋秦開故曰秦淮或云淮水發源

屈曲不類人工

鑿斷山根役萬人祖龍癡絕更東巡石城幾度更新主
贏得淮流尚繫秦

西浦

張碩遇杜蘭香處

珠璫錯落江臯佩羅襪輕盈洛浦妝欲採蘋花擲春信

停橈難覓杜蘭香

桃葉渡

一名南浦渡金陵覽古在秦淮口桃葉者晉王獻之愛妾名也獻之詩云桃葉

復桃葉渡江不用楫但渡無所苦我自迎接汝言不用楫者謂橫波急也獻之歌此送之

帚腰芳草抱長隄南浦年年怨別離水送橫波山斂翠
一如桃葉渡江時

照脂井

陳末後主與張麗華孔貴嬪投景陽井以避隋兵舊傳云欄有石脈以帛拭之

作照脂色又名辱井在法華寺或云白蓮閣下有小池面方丈餘或云在保寧寺覽輝閣側

寒泉玉甃沒春蕪石染照脂潤不枯杏怨桃羞嬌欲墮

猶將紅淚灑黃奴

射殿

有七十間旁多槐竹

鶴蓋陰陰覆苑牆更添蒼雪助清涼高皇儉德規模遠

不作南朝石步廊

李賀詩春熱張鶴蓋鬼目宮槐小蘇子瞻竹詩蒼雪紛紛落夏簟丁公言

詩因憶南朝石步廊

古龍屏風

宣和舊物高宗攜之渡江後壞爛官
官惜之翦裁背成屏風立殿上

乘雲遊霧過江東繪事當年笑葉公可恨橫空千丈勢

剪裁今入小屏風

新亭

在城南十五里金陵覽古在江寧縣十里洛陽四山圍伊洛瀍澗在中建康亦四山

圍秦淮直瀆在中故云風景不殊舉目有山河之異李白云山似洛陽多許渾云祇有青山似洛中謂此也蔡蕤作天津橋亦以此

青山四合遶天津風景依然似洛濱江左于今成樂土
新亭垂淚亦無人

賞心亭

下臨秦淮盡觀覽之勝丁晉公謂建嘗以周昉所畫袁安卧雪圖張于屏後太

守易去續志又云丁始典金陵陞辭之日真宗出八幅袁安卧雪圖付丁謂曰卿到金陵可選一絕景處張此圖謂遂張于賞心亭柱上有蘇子瞻題名猶存

柱上題名客姓蘇江山清絕冠吳都六花飛舞凭闌處
一本天生卧雪圖

同泰寺

在臺城內梁武帝窮竭帑藏造大佛寺
闕七層為天火所禁

布薩關齋涕泗揮大通基在昔人非此身終屬侯丞相
誰辨金錢贖帝歸

宋興寺

劉裕故居也

晉至昌明祚已終識文猶有兩昏童桓元偷得官中璽
卻屬新河伐荻翁

八功德水

在蔣山悟真菴後按梅摯亭記梁天監中有胡僧曇隱寓錫于此山中乏

水時有龐眉叟相謂曰予山龍也知師飲渴措之無難俄而一泓沸成後有西僧繼至云木域八池已失其一似竭彼盈此也其泉一清二冷三香四柔五甘六淨七不饑八躄疴故名八功德水自梁以後常取給

數斗供厨替八珍穿松漱石瑩心神中涵百衲烟霞色
不染齊梁歌舞塵

謝廟

兒輩能軍國未危更令朱序助聲威秦人若有全師集

雲母車盛晉鼎歸

蔣帝廟

白馬千年繫廟門
爐煙浮動袞龍昏
闔棺謾說榮枯定
青骨猶當履至尊

吳大帝陵

老瞞虎裂橫中州
何物生兒作仲謀
四十帝中功第一
壞陵無主使人愁

卞將軍墓

握節顏公拳透爪歸元先軫面如生晉陵發掘今無主
獨有忠魂只治城

張麗華墓

在賞心亭天井中間有光氣如匹練
掬之如水銀漸流散

伴侶聲沈王氣銷香魂血澆有誰招蓬科三尺光塵在
猶作臺城花月妖

臺城

紫蓋橫天整復斜興亡接翅似昏鴉舊時石闕摩雲處
荻屋荆扉一兩家

李氏宮

本朝修李氏宮，掘地得水銀數十斛，乃宮娥素粉膩所積也。事見湘山野錄。

埋愁無地柰君何，可是黃壚飲恨多。
玉鏡臺前棄脂水，深泉流汞尚盈科。

華林園

羽葆來臨鼓吹停，華林暢飲倒長瓶。
萬年天子嘗騰眼，錯認長星作酒星。

昇元閣鐸

今之昇元閣，非古基矣。石柱二，見屹立右軍教場中。昇元閣一名瓦棺閣，乃梁

朝建，高二百四十尺。

摩挲石柱蘚痕斑亡國如鴻去不還無復切雲三百尺
祇傳風鐸在人間

孫陵鵝眼錢

六代初終幾變遷孫陵無樹起寒煙青蚨細薄如榆莢
猶是當年買笑錢

澄心堂紙

王直方詩話澄心堂紙江南李後主所製劉貢父詩當時百金售一幅澄

心堂中千萬軸

楮生玉面霧深藏未肯橫陳翰墨場一幅降牋何用許

價高緣寫宋文章

德慶堂字

李主所書南唐但餘此物李主筆法有鐵鉤鎖

森然筆勢聚干將氣軋鍾王未甯降惆悵當年鐵鉤鎖
可能無意鎖長江

三段石

上元縣南三十里有段石岡丹陽記云有大碣石長二丈折為三段紀吳功德

其文東觀令華覈作其字大篆或又云皇象書也今移在府中

凜然皇象法書存重屋應無野火焚割據英雄餘一念
斷碑千載尚三分

校官碑

在溧陽縣官廳

風摧雨剝校官碑集古先生竟不知同是光和千歲刻
未容苦縣獨稱奇

石步道中有石麒麟數十

地悴天荒立隴平難從野老問衰興蒼烟落日低迷處
折足麒麟記壞陵

鳳州柳

鳳州柳蜀主與江南結婚求得其種鳳州出手柳酒

蜀主函封遣使時芳根元自鳳州移柔莖醞醪今安在

唯有青絲拂地垂

青松路

王介甫手種松

致君堯舜事何難
投老鍾山賦考槃
愁殺天津橋上客

杜鵑聲裏兩眉攢

以上方輿勝覽

翰墨大全羅礪谷謝景建惠金陵百詠書云秦
苗離離參秀芄芄芄古宮于荒畦撫頽城于野
單僕悲馬懷之歎至百詠極矣不知景建是何
肺腑能辨此等惱人言語于千載之下耶

宋詩紀事卷六十七

欽定四庫全書

集部

宋詩紀事卷六十八

詳校官監察御史臣李陽榘

侍讀臣孫球覆勘

總校官進士臣繆琪

校對官中書臣牛稔文

謄錄監生臣黃鑫

欽定四庫全書

宋詩紀事卷六十八

錢塘厲鶚撰

吳大有

大有字有大號松壑嵯縣人寶祐間遊太學率諸生上書言賈似道姦狀不遂退處林泉與林昉仇遠白珽等以詩酒相娛元初辟為國子檢閱不赴

錢陳隨隱歸臨川

我昔見君方成童長吉才華驚鉅公人間科第不屑就
直使聲名聞九重乃翁引上凝華殿子虛不待他人薦
入直來來凡幾年天上奇書盡曾見翩然歸去大江西
二疏父子還相隨故鄉分得雲水地卻喜不爽漁樵期
春雨騎牛對烟草何如振衣隨龍五雲表秋霜黃獨煨
地爐何如駝峯犀筋食天廚林間拾葉抄詩句何如宮
妃捧硯揮毫處溪邊照影著荷衣何如龍門應制奪錦
時釣天夢斷難回顧浩然合在山中住金石臺前伴白

雲六年不踏西湖路今日重來發長吁忍看清平破草
廬盡拈書籍向人賣歸買田園供荷鋤乃翁齒髮落倚
門待兒斜日薄孤山梅花帶不歸卻喚扁舟載童鶴

隨隱

漫錄

遊天竺

編茅為屋住結葉作衣裳不試燒金訣唯尋煮石方洗
瓢溪月冷采藥野雲香常有仙家鶴飛來繞石牀

天竺寺志

雜詩

兩年書問斷湖海竟悠悠一見心雖滿相看淚忽流彩
烟山色暮碧瀨月痕秋明日登程去鵲鷓沙上愁

山中多雨水秋晚正妨農病菜和根煮新粳帶溼春擁
沙埋廢井墮石折枯松寂寂猿啼晝白雲藏數峯

客行情最苦草草共清尊萬水千山路今朝好出門

雁聲低度水村深中有人敲月下砧滿屋秋風燈欲暗

江山千里故園心

以上珊瑚網

陳仁玉

仁玉號碧棲仙居人第進士開慶中禮部郎中
兼崇政殿說書除直祕閣浙東提刑兼知衢州

直敷文閣

南峯寺藍光軒懷吳直翁

懷佳人兮山扃躡烟霏兮步輕蹇獨立兮山上空山無
人兮寒松自聲懷佳人兮何許白雲封關兮猿鶴看戶
羌有懷兮曷愬風虛徐兮簷鐸語辭佳人兮未來聊道

遙兮容與

吳禮部詩話

遊洞霄宮

天柱峯頭疊紫烟遙看萬玉聳相連雲深九鎖疑無路
翠谿一區俄有天爽氣襲人森石樹嗔雷飛雨響山泉
脩然不類人間世今日自驚平地仙

洞霄詩集

題蘇端明書乳泉賦後

坡公謫海上人傳已仙去道逢章子厚遙復返塵路至
言想世驚猶閱乳泉賦遙憐嵩山丘千古不可駐

式古堂書

考

陳宜中

宜中字與權永嘉人景定三年進士第二德祐元年除知樞密院參知政事拜特進右丞相元兵至臨安宜中宵遁入閩益王以為左丞相井澳之敗宜中如占城不反後歿於暹

如占城經吳川極浦亭

顛風吹雨過吳川極浦亭前望遠天有路可通環嶼外無山堪並首陽巔溪雲起處潮初長夜月高時人未眠異

日北歸須記取平蕪盡處一峯圓

廣東通志

丁

開

張中行

開字復見長沙人負氣敢言安撫向士璧被問
開獨詣闕上疏具陳士璧有大功軍府小費不
宜推究書奏羈管揚州歲餘卒

可惜

日者今何及天乎有不平功高人共嫉事定我當烹父
老俱嗚咽天王本聖明不愁懼黨禍攜淚向孤城

漂泊岳陽遇張中行泛舟洞庭晚宿君山聯句

元氣無根株

開

地脈有斷絕

行中

日月互吞吐

開

雲霧自

生滅

行中

楚妃結幽想

開

巴客答清呖

行中

寧知莽蒼中不

假巨鼇力勢閱南紀浮

開

思隨西風發形影寄孤舟

行中

吾道成鳩舌笑談正凌傲

開

俯仰不偏側每與景物會

行中

未省歡娛畢疊翠晚惜惜

開

墮黃秋's的魚龍負鼎

屨

行中

獨鳥去不息曠原眇周抱

開

異境超恍惚徑度萬

頃空

行中

忽得一拳碧稍稍雞犬近

開

依依鐘梵夕推門

月微墮

中

行煮茗香初歇衣裳識霜信

開

瓶鉢了禪悅事

定心源清

中

行夢回斗柄直周游興欲盡

開

長往計未決

出門更回首

中

行沙水盪虛白美哉神禹功

開

已矣三苗

國山川長不朽

中

行愚智俱可惜神交正冥冥

開

指點空

歷歷甚勿語俗人

中

行桃源恐相失

開

建業

誰遣淒涼滿眼中
蘋花渺渺又秋風
龍蹲虎踞江山大
馬去牛來社稷空
縱有千人惟諾諾
本無百歲更怱怱

乾坤顛倒孤舟在聊復殘生伴釣翁

揚州歲莫

萬國回春日層城晚眺餘江聲隔吳楚原色到邳徐大
閱軍容壯狂歌客禮疎百年寒荻裏風雨憶吾廬

以上
谷音

呂人龍

人龍字首之淳安人景定三年進士終承務郎

有鳳山集

春歸

過卻清明豔冶天梨花飛雪柳森煙欲憑鶯燕畱春住
無奈東風信杜鵑

青溪詩話

宿建興寺

路入招提晚更深萬山秋老薄寒生芙蓉枝上無多雨
自把孤懷滴到明

嚴州府志

方逢振

逢振字君玉逢辰弟景定三年進士歷國史實

錄院檢討遷太府寺簿宋亡歸隱風潭有山房

集

風潭精舍偶成

茅屋三間一塢雲此窩真足養吾神不知逐鹿斷蛇手
但見落花啼鳥春石几梅餅添水活地爐茶鼎煮泉新
古今天地何窮盡媿我其間作散人

山房集

徐天祐

天祐字受之山陰人景定三年進士與王修竹

齊名

洛思山

在蕭山昔有洛下人隨太尉朱雋來會稽三年不得返乃登山北望而歎故名

歸去蹉跎歲月深
羈愁無奈故鄉心
人生畢竟俱懷土
莊舄當時自越吟

方干島

在鑑湖中一名筍莊

平生心事白鷗知
一卷雲菴處士詩
占得鏡中奇絕處
祇緣身值廣明時

白樓亭

世說孫興公許元度共在白樓亭高畧先
往名達林公既非所屬聽訖云二賢故自
有才情

江右名流共往還
白樓何許只青山
不須商畧閑今古
物換星移俯仰間

許詢園

在蕭山許詢嘗登永興縣西山築室其上
蕭然自放乃號其岫為蕭山

高樓不受鶴書招
北幹家園久寂寥
明月空懷人姓許
故山猶自岫名蕭

錢王祠

石鏡山前結駟遊
故鄉霞錦徧林邱
祇今東府空遺廟
露立唐碑老樹秋

以上紹興府志

宗必經

必經字子文南昌人景定三年進士通判瑞州
宋亡入元世祖詔求江南人才留夢炎程文海
交薦固辭械至燕繫獄三歲放還有玉溪集

孺子亭

連天大厦莫容身小向湖邊一問津心事說知林下郭
姓名誤入府中陳半篙綠水三間屋一榻清風百世人
只有青青隄上柳至今猶是漢時春

滕王閣

高閣連城十二闌西風領客共躋攀半簾烟雨長空外
千里江湖咫尺間鴈帶秋聲歸別浦鶯分春色過巴山
當年蛺蝶知誰畫一夢莊周去不還

以上南昌府志

家坤翁

坤翁號頤山眉州人景定三年以戶部郎中知

撫州

遊金石臺

撫州羊角山北崖有石岡南向曰金石臺

廬陵遊樂夕陽山太守何人若是班三島幻成一丘小
五峯對峙兩溪環竹間庭院鄰翁卜木杪樓臺仙者寰
紫笑扶疎枝幹老春來得興頗開顏

撫州府志

陳郁

郁字仲文號藏一臨川人理宗朝充緝熙殿應
制景定間充東宮講堂掌書兼撰述德祐乙亥

卒

撫州府志度宗嘗贊郁像云文窺西漢詩到
盛唐侍予左右知汝忠良

石湖歸途

人與西風結約來芙蓉花氣撲吟杯曲塘好處都行徧
帶得一身秋色回

東園書所見

娉婷游女步東園曲徑相逢一少年不肯比肩花下過
含羞卻立海棠邊

城東看柳

翻煖為寒一信風畫橋南北岸西東春歸楊柳無私意
深淺青黃自不同

蘓隄曉望

荷邊清露襲人衣
風裏明蟾浴曉池
涼影潤香吟不得
手扳堤柳立多時

景靈宮恭謝駕回丞相以下皆簪花

幸驂恭謝覩繁華
馬上歸來戴御花
老婦稚兒相顧問
也頌春色到詩家

以上隨隱漫錄

賦翁仲

限久字韻

銅仙擎露秋風表
珍重劉郎千萬壽
老瞞攘鼎貽孫謀

因逼此仙俱受垢仙寧折骨拒非招恥為姦雄效奔走
汚名翁仲俾司門口不能言心自否洛陽宮殿一灰飛
天上此標獨長久君不見堂堂冠劔隱滕城萬古六丁

驅鬼守

隨隱漫錄抱獨山人跋云紹定壬辰九日徐逸觀陳
藏一所作翁仲詩命意布辭灼見魁鄉呼魄指冤俾
受言獎如在荆棘中流涕而話往事嗚呼如詩人
忠憤之心隨事而見可勝歎哉因執筆惘惘而書

劉辰翁

辰翁字會孟廬陵人少登陸象山之門補太學

生景定壬戌廷試對策忤賈似道置丙第以親
老請濂溪書院山長薦居史館又除太學博士
皆固辭宋亡隱居卒有須溪集

蘓李泣別圖

事已矣泣何為蘇武節李陵詩噫

送李鶴田入浙赴趙春谷招

天下南北車書通行人點點過汴宮空餘艮嶽一拳土
黯慘如雪吹不融平乘樓上王夷甫一流中外淚如雨

西風羽扇不障塵，更是蓮子隨根去。政事堂中三相公，
往往退食如夔龍。少年慟哭不見用，一語不合面發紅。
八年流落無處所，合眼當朝竟如許。忠魂不到海門潮，
別殿芙蓉廢為圃。茫茫古路日平西，不信金銅不淚垂。
浮沈親故嬾相問，白髮唯有春風知。李侯髀肉堪流涕，
同谷哀吟越州弟。買絲刺繡刺未成，公子翩翩鴈書至。
飄飄起望白雲間，裘雪牛車度赤山。年餘七十能幾見，
我且欲往窮當還。平生高李經行處，寂寞斷橋漂落絮。

不知到日似枯魚淚入黃河別魴鱖當空殿閣密雲團
曾和薰弦接羽翰至今尚留花石否杜鵑再賦長恨端
蘇州正念東鄰女傷心更遇楊開府語言憔悴敢分明
買酒行澆茂陵土

讀杜拾遺百憂集行有感

我生行年將六十不知何者為憂戚富貴不驕貧賤安
以此存心度朝夕往來承乏佐中書大官羊膳供堂食
只今賜老作編氓衣食信天無固必陋巷簞瓢如素居

不管茅茨春雨溼門前載酒求賦詩錦軸牙籤日堆積
在官不置附郭田既老翻得稽古力毀譽都忘月旦評
姓名不上春秋筆朝米不煩鄰僧送暮米不煩太倉糴
我亦一飯不忘君文人相輕所不及傷哉白首杜拾遺
入蜀還秦勞轍迹文章蓋世亦何為妻子相看百憂集

龍霧洲雪

此處幾人行隔波搖暮晴洲迴江似玦山遠雪如城離
合看雙槽荒寒又一程今年梅未醉最覺別來輕

夜雨

夜半起雷車
天門報曉衙
何消如此雨
又有未開花
繡被人中酒
茅簷客夢家
一晴天地闊
稽首見重華

清明日偶成

海日高高天
欲斜斷橋無
復聽嘔啞墓
中酩酊已千載
陌上清明有
幾家已老愈
疎唯酒盞更
晴相覓是梅花
年年春怨深
如昨莫把無
涯恨有涯

春晴

江柳長天草色齊
新晴何物不芳菲
無因化作千蝴蝶
西蜀東吳款款歸

探梅

江天欲雪未雪時
絕江探梅驢倒騎
空中著我方成畫
亂後逢花且賦詩

以上須溪集

初晴

初日入高樓
歸雲雜江樹
魚游新雨晴
鳥語晨光吐
天容起復覩
烟色轉輕素
牆草麗車前
巷溝映泥路
窗明

祛宿潤礎泣滑微步會朝有宿客過午無來屨沿砌上
蟻衣虛庭竿犢袴人生足無事世故非所慮彼語吾不
聞清風有時度

戲題

無人知坦腹水影半簾苔驚謂青蟲墮垂絲忽上來

春歸

留春一日不可種樹十年未成芳草斷腸花落綠窗攜

手鶯聲

以上天下同文集

宣和雙蟹圖卷

款題已未前史臣某

講餘幾暇諫書空艮嶽江湖入眼中郭索能令天一笑

畫圖何必面春風

郁氏書畫題跋記

錢舜選

舜選號春塘吳江人

景定癸亥特旨以布衣陳隨隱除東宮掌書作詩
賀之

吟筆何須管用銀日供謨述聖恩新只今已脫凡塵去

便作金丹換骨人

夜泛孤篷載月船靜搜吟料六橋邊詩成上達宸聰了
流落人間到處傳

紀夢

翠峯崖我三十六寒泉落空響哀玉斝花石路勢縈紆
玉闌干護修筠綠雪髯老人負紫瓢金絲塵尾遙相招
紅螺酌酒湛湛碧坐倚蒼石吹洞簫孤鶴來傳天上詔
老人挽余偕一到飄飄高舉凌青冥直過罡風履黃道

祥光樓閣倚崢嶸
神虎守關森衛兵
雙闔朱扉忽微啓
中有靈官來遠迎
絳衣持斧立丹陛
玉皇手中玉如意
雲璈風瑟自宮商
天聲清越非人世
帝旁青童傳帝宣
文華宮中呼謫仙
謫仙顧余笑且言
子宜亟反來他年
探懷贈我五色筆
子當寶之慎勿失
濃香氤氳迷帝所
長揖老人下西廡
身從日月上頭行
俯視斗杓分子午
雲氣相隨步武生
過耳但覺松風鳴
覺來握筆記佳夢
月明樓鼓過三更

以上隨隱漫錄

示妹

才過中年百念輕，獨於風月未忘情。
貧將入骨詩方好，事不縈心夢亦清。
萬卷難圖金馬貴，一篷當與白鷗盟。
幸然不作諸侯客，猶恐江湖說姓名。

詩家鼎鑪

韋居安

居安吳興人，宋季進士。司糾三衢，著梅磳詩話。
景定壬戌，得數椽於城南，慈感渡側。詢之故老云：
距賈耘老水閣舊址不遠，因作五言八句。

卜居求靜處喜傍碧溪灣
隔岸高低柳當軒遠近山
天開圖畫久人共水雲閒
聞說賈耘老舊曾居此間

梅磳詩話

凌萬頃

萬頃字叔度號松臞崑山人景定進士

劉龍洲墓

嘗隨薦鶚上天闈肯信荒山泣斷魂
百歲光陰隨酒盡一生氣概祇詩存
冢傾平地藤蘿合碑倚空巖霧雨昏
縱是紙灰那得到落花寒食不開門

崑山縣志

錢選

選字舜舉號玉潭吳興人景定間鄉貢進士家有習嬾齋因自稱習嬾翁雪川翁清臞老人皆其別號也

清河書畫舫錢舜舉與趙子昂同里並在吳興八俊中至元間子昂徵入功名赫赫諸人皆依附取官獨舜舉齟齬不合流連詩畫以老

春暮

晴日溪光動草堂
兩峯浮翠瞰滄浪
獨揮羽扇成何事

更嘆芒屨為底忙一水澄清魚避影萬紅狼藉蝶分香
東風自是無情物白日楊花莫漫狂

友人判太平歸來詩卷

宮錦翩翩五色麟如君端合侍楓宸山中老去陶弘景
湖曲歸來賀季真上界神仙足官府此身城郭舊人民
還鄉我結同盟社只看桃花莫問春

春日即事

十日春風暄且妍溪頭花柳競相鮮美人遙隔山川外

社雨忽來尊俎前
白髮青春猶故我
夕陽幽草自新阡
五陵公子莫相笑
曾散黃金樂少年

雜書

地僻秋深戎馬閒
一尊隨處且開顏
誰思銅雀埋黃土
但憶金人出漢關
六合茫茫天共遠
五湖杳杳雁飛還
中年陶寫無絲竹
王謝風流莫強攀

以上丘吉吳興絕唱

仇書圖

兩兩挾策遊康衢
聚戲不異同隊魚
忽然兒態起爭競

捐棄篋笥仇詩書

自題浮玉山居圖

瞻彼南山岑白雲何翩翩下有幽棲人嘯歌樂徂年叢
石映清泚嘉木淡芳妍日月無終極陵谷從變遷神襟
軼寥廓興寄揮五弦塵影一以絕招隱奚足言

題桃源圖

始信桃源隔幾塵後來無復問津人武陵不是花開晚
流到人間卻暮春

題洪厓先生像卷

神駕馭景颺太虛時總轡元道不可分直悟天人際羣
從昏成仙玩世不計年何當事神遊許我笑拍肩

題竹林七賢圖

昔人好沈酣人事不復理但進杯中物應世聊爾爾悠
悠天地間媮樂本無媿諸賢各有心流俗無輕議

以上
珊瑚

網

題秋茹圖

憶昔毗山愛寫生
瓜茄任我筆縱橫
自憐老去翻成拙
學圃今猶學不成

雪溪翁雪霽望山圖

并引

至元二十九年余留太湖之濱
雪霽舟行溪上西望
弁山作此圖且賦詩云

弁山之陽冠吳興
嵒嶙巖薛望不平煥然仙宮隱其下
衆山所仰青復青
雪花夜積山如換
乘興行舟須放緩
平生不識五老峯
且寫吾鄉一奇觀

倚天蒼弁獨崔嵬仙闕遨遊媿不才攬鏡頻嗟雙鬢改
推窗三見六花開山中酒戶衝寒去城裏行人踏雪來
安得時晴風日好竹林深處且銜杯

以上郁氏書畫題跋記

何基

基字子恭金華人師事黃勉齋景定五年薦舉
賢良咸淳授史館校勘兼崇政殿說書不受卒
學者稱北山先生賜諡文定有集

春日閒居

輕陰薄薄籠朝曦
小雨斑斑溼燕泥
春草堦前隨意綠
曉鶯花裏盡情啼

宋藝圃集

李芾

芾字叔章其先廣平人徙汴南渡徙衡州以蔭
入仕咸淳中知潭州兼湖南安撫使德祐元年
元兵圍城力盡死之贈端明殿學士謚忠節

浯溪讀中興頌

羯鼓梨園跡已荒
斯文猶在日星光
我來細拂青苔石

不憶三郎憶漫郎

永州府志

江萬里

萬里字子遠號古心都昌人太學上舍出身度
宗朝同知樞密院事進參知政事忤賈似道退
居鄱陽元兵至城陷赴止水死贈太師益國公
諡文忠

水亭

結亭臨水似舟中夜雨瀟瀟亂打篷荷葉曉看元不溼

卻疑誤聽五更風

絕句

草際春回殘雪消，強扶衰病傍溪橋。
東風不管梅花落，自釀新黃染柳條。

以上全芳備祖

章鑑

鑑字公秉，寧州人。以別院省試及第，累官權參知政事，遷同知樞密院事。咸淳十年，拜右丞相兼樞密使，元兵逼臨安，鑑託故去，遣使召還，罷。

相予祠季年屏居山中有杭山集

送道士歸得日觀

風月詩幾卷江湖履一雙
斷蛟懷劍石跨鶴叩禪窗
土潤巖生雨林幽寺隔江歸
當訪仙隱相對酒盈缸

杭山

買得漁磯繫釣船
魚龍吹浪駭鷗眠
從來白石清泉地
勝似青山小洞天

以上南昌府志

許月卿

月卿字太空婺源人後字宋士人稱山屋先生
理宗朝進士歷承直郎浙西運幹賈似道當國
試館職言不合罷去閉門著書號泉田子宋亡
不出十年而卒有先天集

追賦暮遊

并序

余庚子冬挈家離廣陵將肄奉常試業于京師舟泊
無錫日已暮與王希聖微服遊南禪蓋訪古也參寥
題名壁無恙寺記有碑碑陰結字甚偉視之蔡京也

出門烟樹蒼然數僧侶語而已余與希聖卻立四顧
曰此佳景也當寫之為詩而舉子業亂其中不能就
暇日追想宛在其日為詩以寄希聖其明年冬十一
月也歲月驅人又可一慨

錫山舟泊似荒村微服南禪古跡存壁上姓名今已遠
碑陰人物了能言薄遊草草寒侵袖遠思悠悠風滿軒
攜手出門煙樹密數僧離立語黃昏

厭厭

厭厭夜飲忘更深客不來辭主有情僮僕觸屏成蝶夢
姬姜摩笛作蟬聲月如有待行行慢風不生嗔細細清
萍散人生何可料婬娟千里共交盟

吟蛩

吟蛩不管興亡事舞蝶那分夢覺身別浦連檣歸遠客

高山小徑過樵人

以上先天集

丁石

石字實道黃巖人

景定壬戌除夜

羅列椒盤人未眠
紅爐圍坐笑燈前
時光過隙那知老
纔到雞鳴又一年
黃巖英氣

宋詩紀事卷六十八